

四庫全書

史部

欽定四庫全書

史部

通鑑總類卷四上
下

詳校官編修

臣

李

潢

侍讀臣孫球覆勘

總校官進士

臣

朱

鈴

校對官中書

臣

張曾炳

謄錄監生

臣

陳

燦

欽定四庫全書

通鑑總類卷四上

宋 沈樞 撰

太后門

茅焦諫秦始皇遷母太后於萇陽宮

九年初王即位年少太后時時與文信侯私通文信侯恐事覺乃詐以舍人嫪毐為宦者進於太后太后幸之生二子封毐為長信侯毐矯王御璽發兵欲攻斬年宮為亂王夷毐三族遷太后於雍萇陽宮殺其二子下令

曰敢以太后事諫者戮而殺之積之闕下死者二十七人齊客茅焦上謁請諫王使謂之曰若不見夫積闕下者邪對曰臣聞天有二十八宿今死者二十七人臣之來固欲滿其數耳臣非畏死者也使者走久白之王大怒曰是人也故來犯吾趣召鑊烹之是安得積闕下哉王按劒而坐召之入茅焦至前再拜謁起稱曰陛下有狂悖之行不自知邪車裂假父囊撲二弟遷母於雍殘戮諫士桀紂之行不至於是矣令天下聞之盡瓦解無

嚮秦者臣竊為陛下危之臣言已矣乃解衣伏質王下殿手自接之曰先生起就衣今願受事乃爵之上卿王自駕虛左方往迎太后歸於咸陽復為母子如初

漢呂太后殺趙王如意及戚夫人

元年五月惠帝即位太后怨戚夫人欲召趙王并誅之王來未到惠帝知太后怒自迎趙王霸上與入宮自挾與起居飲食太后欲殺之不得閭冬十二月惠帝晨出射趙王少不能蚤起太后使人持酖飲之趙王死太后

遂斷戚夫人手足去眼煇耳飲瘖藥使居廁中命曰人彘居數日乃召惠帝觀人彘惠帝見問知其戚夫人乃大哭因病歲餘不能起使人請太后曰此非人所為臣為太后子終不能治天下惠帝以此日飲為淫樂不聽政

文帝免冠謝太后以教子不謹

前三年張釋之為公車令太子與梁王共車入朝不下司馬門於是釋之追止太子梁王無得入殿門遂劾不

敬奏之薄太后聞之文帝免冠謝教兒子不謹薄太后乃使使承詔赦太子梁王然後得入帝由是奇釋之拜為中大夫

竇太后好黃老言

建元元年武帝雅嚮儒術嬰蚡俱好儒推轂代趙綰為御史大夫蘭陵王臧為郎中令綰請立明堂以朝諸侯且薦其師申公武帝使使東帛加璧安車駟馬以迎申公既至舍魯邸議明堂巡狩改厯服色事竇太后好黃

老言不悅儒術趙綰請毋奏事東宮竇太后大怒曰此欲復為新垣平邪陰求得趙綰王臧姦利事以讓武帝武帝因廢明堂事諸所興為皆廢下綰臧吏皆自殺丞相嬰太尉蚡免申公亦以疾免歸

武帝殺鉤弋夫人

後元元年鉤弋夫人之子弗陵年數歲形體壯大多知武帝奇愛之心欲立焉以其年穉毋少欲以大臣輔之後數日武帝譴責鉤弋夫人夫人脫簪珥叩頭武帝曰

引持去送掖庭獄夫人還顧武帝曰趣行汝不得活卒
賜死頃之武帝問居問左右曰外人言云何左右對曰
人言且立其子何去其母乎武帝曰然是非兒曹愚人
之所知也往古國家所以亂由主少母壯也女主獨居
驕蹇淫亂自恣莫能禁也汝不聞呂后邪故不得不先
去之也

太后省政宜知經術

元平元年昌邑王賀廢霍光以羣臣奏事東宮太后省

政宜知經術白令夏侯勝用尚書授太后遷勝長信少府賜爵關內侯

傳太后求稱尊號

綏和二年夏四月丙午哀帝即皇帝位謁高廟尊皇太后曰太皇太后皇后曰皇太后太皇太后令傳太后丁姬十日至未央宮有詔問丞相大司空定陶共王太后宜當何居大司空何武曰可居北宮哀帝從武言北宮有紫房複道通未央宮傳太后從複道朝夕至哀帝

所求欲稱尊號貴寵其親屬高昌侯董宏希指上書言
秦莊襄王母本夏氏而為華陽夫人所子及即位後俱
稱太后宜立定陶共王后為帝太后事下有司大司馬
王莽左將軍師丹劾奏宏知皇太后至尊之號天下一
統而稱引亡秦以為比喻詿誤聖朝非所宜言大不道
傳太后大怒欲必稱尊號哀帝乃白太皇太后令下詔
尊定陶恭王為恭皇又詔曰春秋毋以子貴宜尊定陶
太后曰恭皇太后丁姬曰恭皇后各置左右詹事食邑

如長信宮中官

大司馬王莽令更設傳太后坐

上置酒未央宮內者令為傳太后張幄坐於太皇太后
坐旁大司馬莽按行責內者令曰定陶太后藩妾何以
得與至尊並徹去更設坐傳太后聞之大怒不肯會重
怨恚莽

太后威德至盛

元始二年王莽欲悅太后以威德至盛異於前乃風單

于令遣王昭君女須卜居次云入侍太后所以賞賜之甚厚

太后四時巡狩四郊

四年莽知太后婦人厭居深宮中莽欲虞樂以市其權乃令太后四時車駕巡狩四郊存見孤寡貞婦所至屬縣輒施恩惠賜民錢帛牛酒歲以為常

元后四世為天下母

班彪贊曰三代以來王公失世稀不以女寵及王莽之

興由孝元后歷漢四世為天下母饗國六十餘載羣弟
世權更持國柄五將十侯卒成新都位號已移於天下
而元后卷卷猶握一璽不欲以授莽婦人之仁悲夫

鄧太后聖明

元興元年冬十二月辛未和帝崩初帝失皇子前後十
數後生者輒隱秘養於民間羣臣無知者鄧皇后乃收
皇子於民間長子滕有痼疾少子隆生始百餘日迎立
以為皇太子是夜即皇帝位尊曰皇太后太后臨朝是

時新遭大憂法禁未設宮中亡大珠一篋太后念欲考問必有不辜乃親閱宮人觀察顏色即時首服又和帝幸人吉成御者共枉吉成以巫蠱事下掖庭考訊辭證明白太后以吉成先帝左右待之厚恩平日尚無惡言今反若此不合人情更自呼見寶釵果御者所為莫不歎服以為聖明

詔減服御珍膳等物

延平元年太后詔減太官導官尚方內署諸服御珍膳

靡麗難成之物自非供陵廟稻梁米不得導擇朝夕一
肉飯而已舊太官湯官經用歲且二萬萬自是裁數千
萬及郡國所貢皆減其過半悉斥賣上林鷹犬離宮別
館儲峙米糴薪炭悉令省之

幸洛陽寺決囚而雨

永初二年夏旱五月丙寅皇太后幸洛陽寺及若廬獄
錄囚徒洛陽有囚實不殺人而被考自誣羸困與見畏
更不敢言將去舉頭若欲自訴太后察視覺之即呼還

問狀具得枉實即時收洛陽令下獄抵罪行未還宮澍
雨大降

以陰陽不和減戲樂

三年太后以陰陽不和軍旅數興歲終饗遣衛士勿設
戲作樂減逐疫侏子之半

不聽鄧康宗公損私之戒

永寧元年太后從弟越騎校尉康以太后久臨朝政宗
門盛滿數上書太后以為宜宗公室自損私權言甚切

至太后不從康謝病不朝太后使內侍者問之所使者乃康家先婢自通中大人康問而詬之婢怨恚還白康詐疾而言不遜太后大怒免康官遣歸國絕屬籍

李邵勸順帝奉閹太后

延光四年議郎陳禪以為閹太后與順帝無母子恩宜徙別館絕朝見羣臣議者咸以為宜司徒掾汝南周舉謂李邵曰昔瞽瞍常欲殺舜舜事之逾謹鄭武姜謀殺莊公莊公誓之黃泉秦始皇怨母失行久而隔絕後感

賴考叔茅焦之言復脩子道書傳美之今諸閭新誅太后幽在離宮若悲愁生疾一旦不虞主上將何以令於天下如從禪議後世歸咎明公宜密表朝廷令奉太后率羣臣朝覲如舊以厭天心以荅人望邵即上疏陳之
永建元年春正月順帝朝太后於東宮太后意乃安

梁太后委政宰輔天下咸望治平

永嘉元年太后委政宰輔李固所言太后多從之黃門宦官為惡者一皆斥遣天下咸望治平而梁冀深忌疾

之初順帝時所除官多不以次及固在事奏免百餘人此等既怨又希望冀旨遂共作飛章誣奏固冀以白太后使下其書太后不聽

東晉徐邈臧燾議宣太后配食

太元十九年追尊會稽王太妃鄭氏曰簡文宣太后羣臣謂宣太后應配食元帝太子前率徐邈曰宣太后平素之時不伉儷於先帝至於子孫豈可為祖考立配國學明教東莞臧燾曰今尊號既正則罔極之情申別建

寢廟則嚴禰之義顯繫子為稱兼明貴之所由一舉而允三義不亦善乎乃立廟於太廟路西

燕主寶欲追廢段后睦遽稱子無廢母之義

二十一年初燕主垂先段后生子令寶後段后生子朗鑒愛諸姬子麟農隆柔熙寶初為太子有美稱已而荒怠中外失望後段后嘗言於垂曰太子遭承平之世足為守成之主今國步艱難恐非濟世之才遼西高陽二王陛下之賢子宜擇一人付以大業趙王麟姦詐彊愎

異日必為國家之患宜早圖之寶善事垂左右左右多
譽之故垂以為賢謂段氏曰汝欲使我為晉獻公乎段
氏泣而退告其妹范陽王妃曰太子不才天下所知吾
為社稷言之主上乃以吾為驪姬何其苦哉觀太子必
喪社稷范陽王有非常器度若燕祚未盡其在王乎寶
及麟聞而恨之及寶襲位使麟謂段氏曰后常謂主上
不能守大業今竟能不宜早自裁以全段宗段氏怒曰
汝兄弟不難逼殺其母况能守先業乎吾豈愛死但念

國亡不久耳遂自殺寶議以段后謀廢適統無母后之道不宜成喪羣臣咸以為然中書令睦邃颺言於朝曰子無廢母之義漢安思閹后親廢順帝猶得配饗太廟况先后曖昧之言虛實未可知乎乃成喪

北魏崔光諫胡太后數幸宗戚勲貴之家

梁武帝天監十五年魏胡太后數幸宗戚勲貴之家侍中崔光表諫曰禮諸侯非問疾弔喪而入諸臣之家謂之君臣為謔不言王后夫人明無適臣家之義夫人父

母在有歸寧歿則使卿寧漢上官皇后將廢昌邑霍光
外祖也親為宰輔后猶御武帳以接羣臣示男女之別
也今帝族方衍勲貴增遷祇請遂多將成曩式願陛下
簡息遊幸則率土屬賴含生仰悅矣

唐代宗失太子母沈氏所在

永康元年太子母沈氏吳興人也安祿山之陷長安也
掠送洛陽宮代宗克洛陽見之未及迎歸長安會史思
明再陷洛陽遂失所在代宗即位遣使散求之不獲已

亥壽州宗善寺尼廣澄詐稱太子母按驗乃故少陽院乳母也鞭殺之

分遣諸沈訪求太后

建中元年中書舍人高參諸分遣諸沈訪求太后德宗以睦王述為奉迎使工部尚書喬琳副之又命諸沈四人為判官與中使分行諸道求之

高氏詐稱沈太后

二年初高力士有養女嫠居東京頗能言官中事女官

李真一意其為沈太后詣使者具言其狀德宗聞之驚喜時沈氏故老已盡無識太后者德宗遣宦官宮人往驗視之年狀頗同宦官宮人不審識太后皆言是高氏辭稱實非太后驗視者益疑之強迎入居上陽宮德宗發宮女百餘人齎乘輿御物就上陽宮供奉左右誘諭百方高氏心動乃自言是驗視者走馬入奏德宗大喜羣臣皆入賀詔有司草儀奉迎高氏弟承悅在長安恐不言久獲罪遽自言本末德宗命力士養孫樊景超往

覆視景超見高氏居內殿以太后自處左右侍衛甚嚴
景超謂高氏曰姑何自置身於俎上左右叱景超使下
景超抗聲曰有詔太后詐僞左右可下左右皆下殿高
氏乃曰吾為人所強非已出也以牛車載還其家德宗
恐後人不復敢言太后皆不之罪曰吾寧受百欺庶幾
得之自是四方稱得太后數四皆非是而真太后竟不
知所之

為曾太皇太后沈氏舉哀立忌

永貞元年禮儀使奏曾太皇太后沈氏歲月滋深迎訪理絕按晉庾蔚之議尋求三年之外俟中壽而服之伏請以代行皇帝啟攢宮日皇帝帥百官舉哀即以其日為忌順宗從之

郭太后不肯臨朝稱制

長慶四年穆宗疾復作命太子臨國宦官欲請郭太后臨朝稱制太后曰昔武后稱制幾傾社稷我家世守忠義非武氏之比也太子雖少但得賢宰相輔之卿輩勿

預朝政何患國家不安自古豈有女子為天下主而能致唐虞之理乎取制書手裂之太后兄太常卿釗聞有是議密上牋曰若果徇其請臣請先帥諸子納官爵歸田里太后泣曰祖考之慶鍾於吾兄是夕穆宗崩敬宗即位于太極東序

蕭洪詐稱蕭太后弟為太子洗馬

太和二年初蕭太后幼去鄉里有弟一人文宗即位命福建觀察使求訪莫知所在有茶綱役人蕭洪自言有

姊流落商人趙縝引之見太后近親呂璋之妻亦不能辨與之俱見太后穆宗以為太子洗馬

蕭洪詐冒事覺被誅蕭本復詐作太后弟

開成元年鄜坊節度使蕭洪詐稱太后弟事覺流驩州於道賜死趙縝呂璋等皆流嶺南太后有異母弟在閩中孱弱不能自達有閩人蕭本從之得真內外族諱因仇士良進達於文宗且發洪之詐洪由是得罪文宗以本為真太后弟遂擢為右贊善大夫

蕭弘詐稱太后族人

二年福建奏晉江百姓蕭弘稱太后族人詔御史臺按之御史臺奏蕭弘詐妄詔遞歸鄉里不之罪冀得其真蕭本蕭弘皆流遠州

四年十一月三司按蕭本蕭弘皆非真太后弟本除名流愛州弘流儋州而太后真弟在閩中終不能自達

王皞力爭郭太后合祔憲宗室坐貶

大中二年初憲宗之崩宣宗疑郭太后預其謀又鄭太

后本郭太后侍兒有宿怨故宣宗即位待郭太后禮殊薄郭太后意快快一日登勤政樓欲自墮宣宗聞之大怒是夕崩外人頗有異論宣宗以鄭太后故不欲以郭后祔憲宗有司請葬景陵外園禮官王皞奏宜合葬景陵神主配憲宗室奏入宣宗大怒白敏中召皞詰之皞曰太皇太后汾陽王之孫憲宗在東宮為正妃逮事順宗為婦憲宗厭代之夕事出曖昧太皇太后母天下歷五朝宜得以曖昧之事遽廢正嫡之禮乎敏中怒甚皞

辭氣愈厲周墀入至敏中廳問其事見皞爭辨方急墀舉手加額歎皞直明日皞坐貶官

後唐曹太后與劉太妃相得甚歡

同光元年晉王即皇帝位國號大唐尊母晉國太夫人曹氏為皇太后嫡母秦國夫人劉氏為皇太妃詔盧程詣晉陽冊太后太妃初太妃無子性賢不妬忌太后為武皇侍姬太妃常勸武皇善待之太后亦自謙退由是相得甚歡及受冊太妃詣太后宮賀有喜色太后忸怩

不自安太妃曰願吾兒享國久長吾輩獲沒于地園陵有主餘何足言因相向歔歔

太后欲親省太妃疾

三年太后自與太妃別常忽忽不樂雖娛玩盈前未嘗解顏太妃既別太后亦邑邑成疾太后遣中使醫藥相繼於道聞疾稍加輒不食又謂莊宗曰吾與太妃恩如兄弟欲自往省之莊宗以天暑道遠苦諫久之乃止

皇后門

東漢馬貴人德冠後宮

永平二年二月立貴人馬氏為皇后皇子烜為太子后援之女也光武時以選入太子宫能奉承陰后傍接同列禮則脩備上下安之遂見寵異及明帝即位為貴人時后前母姊女賈氏亦以選入生皇子烜明帝以后無子命養之謂曰人未必當自生子但患愛養不至耳后於是盡心撫育勞悴過於所生太子亦孝性淳篤母子慈愛始終無纖介之間后常以皇嗣未廣薦達左右若

恐不及後宮有進見者每加慰納若數所寵引輒增隆
遇及有司奏立長秋宮明帝未有所言皇太后曰馬貴
人德冠後宮即其人也后既正位宮闈愈自謙肅好讀
書常衣大練裙不加緣朔望諸姬主朝請望見后袍衣
踈麤以為綺縠就視乃笑后曰此繒特宜染色故用之
耳羣臣奏事有難平者明帝數以試后后輒分解趣理
各得其情然未嘗以家私干政事明帝由是寵敬始終
無衰焉

陰后挾巫蠱坐廢

永元十四年陰皇后多妬忌寵遇浸衰數懷恚恨后外祖母鄧朱出入宮掖有言后與朱共挾巫蠱道者和帝使中常侍張慎與尚書陳褒案之劾以大逆無道朱二子奉毅后弟輔皆考死獄中后坐廢遷于桐宮以憂死父特進綱自殺后弟軼敞及朱家屬徙日南比景

鄧后盛德

初太傅鄧禹嘗謂人曰吾將百萬之衆未嘗妄殺一人

後世必有興者其子護羌校尉訓有女曰綏性孝友好書傳常晝修婦業暮誦經典家人號曰諸生後選入宮為貴人恭肅小心動有灋度嘗有疾和帝特令其母兄弟入親醫藥不限以日數貴人辭曰宮禁至重而使外舍久在內省上令陛下有私幸之譏下使賤妾獲不知足之謗上下交損誠不願也每有燕會諸姬競自修飾貴人獨尚質素其衣有與陰后同色者即時解易若並時進見則不敢正坐離立行則僂身自卑和帝每有所

問常逡巡後對不敢先后言陰后見貴人德稱日盛深疾之和帝嘗寢病危甚陰后密言我得意不令鄧氏復有遺類貴人聞之流涕言曰我竭誠盡心以事皇后竟不為所祐今我當從死上以報帝之恩中以解宗族之禍下不令陰氏有人豕之譏即欲飲藥宮人趙玉者固禁之明日上果瘳及陰后之廢詔立貴人鄧氏為皇后辭讓不得已然後即佐帝每欲官爵鄧氏后輒哀請謙讓故兄隲終帝世不過虎賁中郎將

胡廣等諫順帝以籌策選后

永建六年順帝欲立皇后而貴人有寵者四人莫知所
建議欲探籌以神定選胡廣與郭虔史敞上疏諫曰恃
神任筮既不必當賢就值其人猶非德選夫岐嶷形於
自然倪天必有異表宜參良家簡求有德德同以年年
鈞以貌稽之典經斷之聖慮順帝從之恭懷皇后弟子
乘氏侯商之女選入掖庭為貴人常特被引御從容辭
曰夫陽以博施為德陰以不專為義螽斯則百福之所

由興也願陛下思雲雨之均澤小妾得免於罪順帝由是賢之陽嘉元年立貴人梁氏為皇后

漢劉聰立王沈養女為左皇后宣懷養女為中皇后

晉太興元年漢中常侍王沈養女有美色漢主聰立以為左皇后尚書令王鑒中書監崔懿之中書令曹恂諫曰臣聞王者立后比德乾坤生承宗廟設配后土必擇世德名宗幽閒令淑乃副四海之望稱神祇之心孝成

帝以趙飛鸞為后使繼嗣絕滅社稷為墟此前鑑也自
麟嘉以來中宮之位不以德舉借使沈之弟女刑餘小
醜猶不可以塵于椒房况其家婢邪六宮妃嬪皆公子
公孫奈何一旦以婢主之臣恐非國家之福也聰大怒
使中常侍宣懷謂太子粲曰鑒等小子狂言侮慢無復
君臣上下之禮其速考竟於是收鑒等送市皆斬之金
紫光祿大夫王延馳將入諫門者弗通聰又立宣懷養
女為中皇后

劉曜立羊氏為皇后

二年漢主曜還都長安立妃羊氏為皇后即故惠帝后也曜嘗問之曰吾何如司馬家兒羊氏曰陛下開基之聖主彼亡國之暗夫何可並言彼貴為帝王有一婦一子及身三耳猶不能庇妾於爾時實不欲生意謂世間男子皆然自奉巾櫛已來始知天下自有丈夫耳曜甚寵之頗干預國事

隋文帝寵憚獨狐皇后宮中稱二聖

陳大建十三年獨狐皇后家世貴盛而能謙恭雅好讀書言事多與隋主意合文帝甚寵憚之宮中稱為二聖文帝每臨朝后輒與文帝方輦而進至閣乃止使宦官伺文帝政有所失隨即匡諫候文帝退朝同反燕寢有司奏稱周禮百官之妻命於王后請依古制后曰婦人預政或從此為漸不可開其源也大都督崔長仁后之中外兄弟也犯灋當斬文帝以后故欲免其罪后曰國家之事焉可顧私長仁竟坐死后性儉約文帝常合止

利藥須胡粉一兩宮內不用求之竟不得又欲賜柱國
劉嵩妻織成衣領宮內亦無之然文帝懲周氏之失不
以權任假借外戚后兄弟不過將軍刺史

唐太宗長孫皇后讀書循禮節儉

武德九年立妃長孫氏為皇后后少好讀書造次必循
禮灋太宗為秦王與太子建成齊王元吉有隙后奉事
高祖承順妃嬪彌縫其闕甚有內助及正位中宮務崇
節儉服御取給而已太宗深重之嘗與之議賞罰后辭

曰北雖之晨唯家之索妾婦人安敢豫聞政事固問之終不對

稱贊魏徵正直

貞觀六年長樂公主將出降太宗以公主皇后所生特愛之勅有司資送倍於永嘉長公主魏徵諫曰昔漢明帝欲封皇子曰我子豈得與先帝子比皆令半楚淮陽今資送公主倍於長主得無異於明帝之意乎太宗然其言入告皇后后歎曰妾亟聞陛下稱重魏徵不知其

故今觀其引禮義以抑人主之情乃知真社稷之臣也
妾與陛下結髮為夫婦曲承恩禮每言必先候顏色不
敢輕犯威嚴況以人臣之踈遠乃能抗言如是陛下不
可不從也因請遣中使齎錢四百緡絹四百匹以賜徵
且語之曰聞公正直乃今見之故以相賞公宜常秉此
心勿轉移也太宗嘗罷朝怒曰會須殺此田舍翁后問
為誰太宗曰魏徵每廷辱我后退具朝服立于庭太宗
驚問其故后曰妾聞主明臣直今魏徵直由陛下之明

故也妾敢不賀太宗乃悅

仁孝儉素引賢獻納

十年長孫皇后性仁孝儉素好讀書常與太宗從容商略古事因而獻替裨益弘多宮壺之中刑無枉濫訓諸子常以謙儉為先太子乳母遂安夫人嘗白后以東宮器用少請奏益之后不許曰為太子患在德不立名不揚何患無器用邪太宗得疾累年不愈后侍奉晝夜不離側常繫毒藥於衣帶曰若有不諱義不獨生后素有

氣疾前年從太宗幸九成宮柴紹等中夕告變太宗擢
甲出閣問狀后扶疾以從左右止之后曰上既震驚吾
何心自安由是疾遂甚太子言於后曰醫藥備盡而疾
不瘳請奏赦罪人及度人入道庶獲冥福后曰死生有
命非智力所移若為善有福則吾不為惡如其不然妄
求何益赦者國之大事不可數下道釋異端之教蠹國
病民皆上素所不為奈何以吾一婦人使上為所不為
乎必行汝言吾不如速死太子不敢奏及疾篤與太宗

訣時房玄齡以譴歸第后言於太宗曰玄齡事陛下久
小心慎密苟無大故願勿棄之妾之本宗因緣葭莩以
致祿位欲使其子孫保全慎勿處之權要妾生無益於
人不可以死害人但因山為墳器用瓦木而已仍願陛
下親君子遠小人納忠諫屏讒慝省作役止遊畋妾雖
沒於九泉誠無所恨又嘗采自古婦人得失事為女則
三十卷又嘗著論駁漢明德馬后以不能抑退外親使
當朝貴盛徒戒其車如流水馬如龍是開其禍敗之源

而防其末流也及崩宮司并女則奏之太宗覽之悲慟以示羣臣曰皇后此書足以垂範百世朕非不知天命而為無益之悲但入宮不復聞規諫之言失一良佐故不能忘懷耳乃召房玄齡使復其位

高宗寵幸武氏

永徽五年加贈武德功臣屈突通等十三人官初王皇后無子蕭淑妃有寵王后疾之高宗之為太子也入侍太宗見才人武氏而悅之太宗崩武氏隨衆感業寺為

尼忌日高宗詣寺行香見之武氏泣高宗亦泣王后聞之陰令武氏長髮勸高宗內之後宮欲以間淑妃之寵武氏巧慧多權數初入宮卑辭屈體以事后后愛之數稱其美於高宗未幾大幸拜為昭儀后及淑妃寵皆衰更相與共譖之高宗皆不納昭儀欲追贈其父而無名故託以褒賞功臣徧贈屈突通等而武士彠預焉

褚遂良等諫立武后不聽

六年高宗一日退朝召長孫无忌李勣于志寧褚遂良

入內殿勛稱疾不入无忌等至內殿高宗顧谓无忌曰
皇后無子武昭儀有子今欲立昭儀為后何如遂良對
曰皇后名家先帝為陛下所娶先帝臨崩執陛下手謂
臣曰朕佳兒佳婦今以付卿此陛下所聞言猶在耳皇
后未聞有過豈可輕廢臣不敢曲從陛下上違先帝之
命高宗不悅而罷明日又言之遂良曰陛下必欲易皇
后伏請妙擇天下令族何必武氏武氏經事先帝衆所
共知天下耳目安可蔽也萬代之後謂陛下為如何願

留三思臣今忤陛下意罪當死因置笏於殿階斛巾叩
頭流血曰還陛下笏乞放歸田里高宗大怒命引出昭
儀在簾中大言曰何不撲殺此獠无忌曰遂良受先朝
顧命有罪不可加刑于志寧不敢言韓瑗上疏諫曰皇
后母儀萬國善惡由之故嫫母輔佐黃帝妲己傾覆殷
王詩云赫赫宗周褒姒滅之每覽前古常與歎息不謂
今日塵黷聖代作而不灋後嗣何觀臣恐海內失望棘
荆生於闕庭宗廟不血食期有日矣來濟上表諫曰王

者立后上瀛乾坤必擇禮教名家幽閒令淑副四海之望稱神祇之意是故周文造舟之迎太姒而興闕雎之化百姓蒙祚孝成縱欲以婢為后使皇統亡絕社稷傾淪有周之隆既如彼大漢之禍又如此惟陛下詳察高宗不納它日李勣入見高宗問之曰朕欲立武昭儀為后遂良固執以為不可遂良既顧命大臣事當且已乎對曰此陛下家事何必更問外人高宗意遂決下詔稱王皇后蕭淑妃謀行鴆毒廢為庶人又下詔曰武氏門

著勲庸地華纓黻往以才行選入後庭特荷先慈以武氏賜朕事同政君可立為皇后命司空李勣齊璽綬冊皇后武氏故后王氏淑妃蕭氏並囚於別院

大權悉歸中宮中外謂之二聖

麟德元年初武后能屈身忍辱奉順上意故高宗排羣議而立之及得志專作威福高宗欲有所為動為后所制高宗不勝其忿有道士郭行真出入禁中嘗為厭勝之術宦者王伏勝發之高宗大怒密召西臺侍郎同東

西臺二品上官儀議之儀因言皇后專恣海內所不與
請廢之高宗意亦以為然即命儀草詔左右奔告于后
后遽詣高宗自訴詔草猶在高宗所高宗羞縮不忍復
待之如初猶恐后怨怒因紹之曰我初無此心皆上官
儀教我於是使許敬宗誣奏儀伏勝與太子忠謀大逆
儀下獄與其子庭芝王伏勝皆死籍沒其家賜忠死于
流所朝士流貶者甚衆皆坐與儀交通故也自是高宗每
視事則后垂簾於後政無大小皆預聞之天下大權悉歸

中宮黜陟生殺決於其口天子拱手而已中外謂之二聖

天后欲攝知國政

上元二年天后視先蠶于邙山之陽百官及朝集使皆
倍位高宗苦風眩甚議使天后攝知國政郝處俊曰天
子理外后理內天之道也昔魏文帝著令雖有幼主不
許皇后臨朝所以杜禍亂之萌也陛下奈何以高祖太
宗之天下不傳之子孫而妻之天后乎李義琰曰處俊
之言至忠陛下宜聽之高宗乃止天后多引文學之士

著作郎元萬頃左史劉禕之等使之撰列女傳臣軌百僚新戒樂書凡千餘卷朝廷奏議及百司表疏時密令參決以分宰相之權時人謂之北門學士

韋后干預朝政如武后

神龍元年中宗在房陵與后同幽閉備嘗艱危情愛甚篤中宗每聞勅使至輒惶恐欲自殺后止之曰禍福無常寧失一死何遽如是中宗嘗與后私誓曰異時幸復見天日當惟卿所欲不相禁禦及再為皇后遂干預朝

政如武后在高宗之世桓彥範上表以為易稱无攸遂
在中饋貞吉書稱牝雞之辰惟家之索伏見陛下每臨
朝皇后必施帷幔坐殿上預聞政事臣竊觀自古帝王
未有與婦人共政而不破國亡身者也且以陰乘陽違
天也以婦陵夫違人也伏願陛下覽古今之戒以社稷
蒼生為念令皇后專居中宮治陰教勿出外朝干國政
先是胡僧慧範以妖妄遊權貴之門與張易之兄弟善
韋后亦重之及易之誅復稱慧範預其謀以功加銀青

光祿大夫賜爵上庸縣公出入宮掖中宗數微行幸其舍彥範復表言慧範執左道以亂政請誅之中宗皆不聽

韋后弑中宗自總庶政

景雲元年散騎常侍馬秦客以醫術光祿少卿楊均以善烹調皆出入宮掖得幸於韋后恐事泄被誅安樂公主欲韋后臨朝自為皇太女乃相與合謀於餅餼中進毒中宗崩於神龍殿韋后祕不發喪自總庶政

明皇欲立武惠妃為皇后

開元十四年明皇欲以武惠妃為皇后或上言武氏乃不戴天之讎豈可以為國母人間盛言張說欲取立后之功更圖入相之計且太子非惠妃所生惠妃復自育子若登宸極太子必危明皇乃止然宮中禮秩一如皇后

百官請加張后尊號

乾元二年百官請加皇后尊號曰輔聖肅宗以問中書

舍人李揆對曰自古皇后無尊號惟韋后有之豈足為
灋肅宗驚曰庸人幾誤我會月食事遂寢后與李輔國
相表裏橫於禁中干豫政事請託無窮肅宗頗不悅而
無如之何

後唐莊宗劉夫人答劉叟于官門

後梁貞明三年晉王元妃衛國韓夫人次燕國伊夫人
次魏國劉夫人劉夫人最有寵其父成安人以醫卜為
業夫人幼時晉將袁建豐掠得之入于王宮性狡悍淫

妬從王在魏父聞其貴詣魏宮上謁王召袁建豐示之
建豐曰始得夫人時有黃鬚丈人護之此是也王以語
夫人夫人方與諸夫人爭寵以門地相高恥其家寒微
大怒曰妾去鄉時略可記憶妾父不幸死亂兵妾守屍
哭之而去今何物田舍翁敢至此命笞劉叟于宮門

劉后迫莊宗以幸姬賜李紹榮

同光二年以武寧節度使李紹榮為歸德節度使同平
章事留宿衛寵遇甚厚莊宗或時與太后皇后同至其

家莊宗有幸姬色美嘗生子矣劉后妬之會紹榮喪妻
一日侍禁中莊宗問紹榮汝復娶乎為汝求昏后因指
幸姬曰大家隣紹榮何不以此賜之莊宗難言不可微
許之后趣紹榮拜謝比起顧幸姬已肩輿出宮矣莊宗
為之託疾不食者累日

皇后請父事張全義

莊宗及皇后如張全義第全義大陳貢獻酒酣皇后奏
稱妾幼失父母見老者輒思之請父事全義莊宗許之

全義惶恐固辭再三彊之竟受皇后拜復貢獻謝恩明日后命翰林學士趙鳳草書謝全義鳳密奏自古無天下之母拜人臣為父者莊宗嘉其直然卒行之自是后與全義日遣使往來問遺不絕

明宗曹淑妃遜王德妃為后王德妃不許

長興元年明宗將立曹淑妃為后淑妃謂王德妃曰吾素病中煩倦於接對妹代我為之德妃曰中宮敵偶至尊誰敢干之遂立淑妃為皇后德妃事后恭謹后亦憐

之初王德妃因安重誨得進常德之明宗性儉約及在
位久宮中用度稍侈重誨每規諫妃取外庫錦造地衣
重誨切諫引劉后為戒妃由是怨之

吳越恭穆夫人慈愛

後晉天福四年吳越恭穆夫人馬氏雄武節度使綽之
女也初武肅王鏐禁中外蓄聲妓文穆王元瓘年三十
餘無子夫人為之請於鏐鏐喜曰吾家祭祀汝實主之
乃聽原瓘納妾鹿氏生弘傳弘侖許氏生弘佐吳氏生

弘叔衆妻生弘堪弘億弘儀弘偓弘仰弘信夫人撫視
慈愛如一常置銀鹿於帳前坐諸兒於上而弄之

後晉齊王立重脗妻馮氏為皇后

八年立吳國夫人馮氏為皇后初高祖愛少弟重脗養
以為子及留守鄴都娶副留守安喜馮濛女為其婦重
脗早卒馮夫人寡居有美色齊王見而悅之高祖崩梓
宮在殯齊王遂納之羣臣皆賀齊王謂馮道等曰皇太
后之命與卿等不任大慶羣臣出齊王與夫人酣飲過

梓宮前輟而告曰皇太后之命與先帝不任大慶左右
失笑齊王亦自笑顧謂左右曰我今日作新婿何如夫
人與左右皆大笑太后雖恚而無如之何既正位中宮
頗預政事后兄王時為禮部郎中鹽鐵判官齊王驟擢
用至端明殿學士戶部侍郎與議政事

外戚門

漢文帝不用竇廣國為相

後二年丞相張蒼免文帝以皇后弟竇廣國賢有行欲

相之曰恐天下以吾私廣國久念不可而高帝時大臣
餘見無可者御史大夫梁國申屠嘉故以材官蹶張從
高帝封關內侯

元帝不以馮野王為御史大夫

竟寧元年御史大夫缺在位多舉大鴻臚馮野王元帝
使尚書選第中二千石而野王行能第一元帝以問石
顯顯曰九卿無出野王者然野王親昭儀兄臣恐後世
必以陛下度越衆賢私後宮親以為三公元帝曰善吾

不見是因謂羣臣曰吾用野王為三公後世必謂我私後宮親屬以野王為比遂以少傅張譚為御史大夫

成帝封諸舅為侯黃霧四塞

建始元年封舅諸吏光祿大夫關內侯王崇為安成侯賜舅譚商立根遂時爵關內侯夏四月黃霧四塞詔博問公卿大夫無有所諱諫大夫楊興博士駟勝等對皆以為陰盛侵陽之氣也高祖之約非功臣不侯今太后諸弟皆以無功為侯外戚未曾有也故天為見異於是

大將軍鳳懼上書乞骸骨辭職成帝優詔不許

同日封五侯

河平二年悉封諸舅王譚為平阿侯商為成都侯立為紅陽侯根為曲陽侯逢時為高平侯五人同日封故世謂之五侯

劉向極言王氏太盛

陽朔二年以侍中太僕王音為御史大夫於是王氏逾盛郡國守相刺史皆出其門下五侯羣弟爭為奢侈賂

遺珍寶四面而至皆通敏人事好士養賢傾財施予以
相高尚賓客滿門競為之聲譽劉向遂上封事極諫曰
孔子曰祿去公室政逮大夫危亡之兆也今王氏一姓
乘朱輪華轂者二十三人青紫貂蟬充盈幄內大將軍
秉事用權五侯驕奢僭盛並作威福尚書九卿州牧郡
守皆出其門筦執樞機朋黨比周歷上古至秦漢外戚
僭貴未有如王氏者也宜發明詔黜遠外戚毋授以政
皆罷令就第則王氏永存保其爵祿劉氏長安不失社

稷子子孫孫無疆之計也書奏成帝召見向歎息悲傷其意然終不能用其言

五侯爭以奢侈相尚

鴻嘉三年王氏五侯爭以奢侈相尚成都侯商嘗病欲避暑從上借明光宮後又穿長安城引內灋水注第中大陂以行船成帝幸商第見穿城引水意恨內衡之末言後微行出過曲陽侯第又見園中土山漸臺象白虎殿於是成帝怒使尚書責問司隸校尉京兆尹知成都

侯商等奢僭不軌藏匿姦猾皆阿縱不舉奏正灋又詔
尚書奏文帝時誅將軍薄昭故事車騎將軍音藉亭請
罪商立根皆負斧質謝良久乃已成帝特欲恐之實無
意誅也

師丹諫哀帝不宜遽寵親屬

綏和二年以師丹為大司空丹見上多所匡改成帝之
政乃上書言前大行屍柩在堂而官爵臣等以及親屬
赫然皆貴寵封舅為陽安侯皇后尊號未定豫封父為

孔鄉侯此皆舉錯失中瀆度失理願陛下且克己躬行以觀羣下之從化肺附何患不富貴不宜倉卒若是傳太后從弟子遷在左右尤傾邪哀帝惡之免官遣歸故郡傳太后怒復為侍中其逼於傳太后皆此類也

何武公孫祿不肯舉王莽

元壽二年太皇太后詔公卿舉可大司馬者莽故大司馬辭位避丁傳衆庶稱以為賢又太皇太后近親自大司徒孔光以下舉朝皆舉莽獨前將軍何武右將軍公

孫祿二人相與謀以為往時惠昭之世外戚呂霍上官持權幾危社稷今孝成孝哀比世無嗣方當選立近親幼主不宜令外戚大臣持權親疏相錯為國計便於是武舉公孫祿可大司馬而祿亦舉武太皇太后自用莽為大司馬領尚書事

東漢陰鄉侯讓封

光武建武二年陰鄉侯陰識貴人之兄也以軍功當增封識叩頭讓曰天下初定將帥有功者衆臣託屬掖庭

仍加爵邑不可以示天下此為親戚受賞國人計功也
帝從之

章帝欲封諸舅太后不聽

建初二年上欲封爵諸舅太后不聽會大旱言事者以
為不封外戚之故有司請依舊典太后詔曰凡言事者
皆欲媚朕以要福耳昔王氏五侯同日俱封黃霧四塞
不聞澍雨之應夫外戚貴盛鮮不傾覆故先帝防慎舅
氏不令在樞機之位又言我子不當與先帝子等今有

司奈何欲以馬氏比陰氏乎且陰衛尉天下稱之省中御者至門出不及履此遽伯玉之敬也新陽侯雖剛彊微失理然有方略據地談論一朝無雙原鹿貞侯勇猛誠信此三人者天下選臣豈可及哉馬氏不及陰氏遠矣吾豈可上負先帝之旨下虧先人之德重襲西京敗亡之禍哉固不許

有司請封諸舅太后不許

四年有司連據舊典請封諸舅章帝以天下豐稔方垂

無事遂封衛尉廖等為侯太后聞之曰吾少壯時但慕竹帛志不顧命今雖已老猶戒之在得冀秉此道不負先帝所以化導兄弟共同斯志欲令瞑目之日無所復恨何意老志復不從哉廖等並辭讓願就關內侯帝不許廖等不得已受封爵而上書辭位帝許之

崔駰戒竇憲

章和二年太后臨朝竇憲兄弟皆在親要之地崔駰以書戒憲曰傳曰生而富者驕生而貴者傲生富貴而能

不驕傲者未之有也。今寵祿初隆，百僚觀行，豈可不庶幾夙夜，以永終譽乎？昔馮野王以外戚居位，稱為賢臣。近陰衛尉克已復禮，終受多福。外戚所以獲譏於時，垂愆於後者，蓋在滿而不挹，位有餘而仁不足也。漢興以後，迄于哀平，外家二十保族，全身四人而已。書曰：「監于有殷，可不慎哉！」

竇憲威名益盛

永元三年，竇憲既立大功，威名益盛。刺史守令多出其

門競賦歛吏民共為賂遺司徒袁安司空任隗舉奏諸
二千石并所連及貶秩免官者四十餘人竇氏大恨但
安隗素行高亦未有以害之尚書僕射樂恢刺舉無所
回避憲等疾之恢上疏曰陛下富於春秋纂承大業諸
舅不宜幹正王室以示天下之私方今之宜上以義自
割下以謙自引四舅可長保爵土之榮皇太后永無慙
負宗廟之憂誠策之上者也書奏不省恢稱疾歸長陵
憲風厲州郡迫脅恢飲藥死於是朝臣震懼望風承旨

無敢違者。袁安以天子幼弱，外戚擅權，每朝會進見，及與公卿言國家事，未嘗不喑鳴流涕。自天子及大臣皆恃賴之。

韓稜不拜竇憲

詔竇憲與車駕會長安，憲至尚書以下議欲拜之，伏稱萬歲。尚書韓稜正色曰：「夫上交不諂，下交不黷，禮無人臣稱萬歲之制。」議者皆慙而止。尚書左丞王龍私奏記上牛酒於憲，稜舉奏，龍論為城旦。

晉裴頠辭位惠帝不從

元康九年裴頠為尚書僕射頠雖賈后親屬然雅望素隆四海唯恐其不居權位尋詔頠專任門下事頠上表固辭以賈模適亡復以臣代之崇外戚之望彰偏私之舉為聖朝累不聽或謂頠曰君可以言當盡言於中宮言而不從當遠引而去儻二者不立雖有十表難以免矣頠慨然久之竟不能從

齊崔光謂馮熙家富貴太盛必敗

東昏侯永元元年馮熙以明太后之兄尚恭宗女博陵長公主熙有三女二為皇后一為左昭儀由是馮氏貴寵冠羣臣賞賜累巨萬公主生二子誕脩熙為太保誕為司徒脩為侍中尚書庶子聿為黃門郎黃門侍郎崔光與聿同直謂聿曰君家富貴太盛終必衰敗聿曰我家何所負而君無故詛我光曰不然物盛必衰此天地之常理若以古事推之不可不慎後歲餘而脩敗黜為平城民及誕熙繼卒幽后尋廢聿亦擯棄馮氏遂衰

唐武平一請抑損外戚

景龍二年起居舍人武平一上表請抑損外戚權寵不敢斥言韋氏但請抑損已家中宗不許

通鑑總類卷四上